

Oktòb 2011

konferans jeneral

Chwazi Lavi Etènèl

libabit

responsablite

konferans jeneral

Chwazi Lavi Etènèl

Pa Èldè Randall K. Bennet

Nan Swasanndis yo

Destine etènèl nou se p ap rezilta aza men se ap rezilta chwa nou yo. Li pa janm twò ta pou nou kòmanse chwazi lavi etènèl!

Sa gen plizyè ane anviwon, pandan m te sou plaj avèk fanmi mwen, m te remake pano ak drapo ki te avèti nou ke yon kouran fò te soti nan rivaj la pou ale nan direksyon dlo pwofon ak ajite. Sa te parèt envizib pou je mwen ki pa t antrene pou sa, men, sovètè yo ki te sou yon semafò tou pre a te fasilman detekte ke, kouran pisan an te poze yon danje pou tout moun ki te kite zòn sekirite rivaj la pou antre nan dlo a. Mwen raple k m te di, pou jistifye tèt mwen: “Mwen se yon gwo najè. Naje se ap yon bon egzèsis. M ap ansekirite si m pa elwaye m twòp de plaj la.”

Pandan ke m te inyore avètisman yo epi m te konfyan nan pwòp jijman pa m, mwen te antre nan dlo a pou m jwi yon naj “rafrechisan”. Apre kèk minit, mwen leve tèt mwen pou lokalize fanmi m sou plaj la tou pre a, men plaj la pa t pre ankò! Kouran twonpè a yo te avèti a te pran m epi trennen m rapidman byen lwen fanmi m.

Avèk konfyans okòmansman epi dezespereman apre, mwen te eseye naje al sou rivaj la, men kouran enplakab la te trennen m ale byen lwen pi fon, kote dlo a te pi ajite toujou. Mwen te vin fatigue e m te kòmanse ap toufe paske m t ap vale dlo. Mwen te reyalize ke m ta ka nwaye. Enèji m te ale, mwen te dezespereman e finalman rele pou mande èd.

Mirakilezman, li sanble, yon sovèt te twouve l akote m imedyatman. Mwen pa t konnen si li t ap suiv mwen lè m te m antre nan dlo a. Li te konnen kouran an t apral pran mwen, e li te konnen ki kote li t ap mennen m. Pandan ke l te kontoune kouran an, li te naje rive yon kote ki te yon ti kras pi lwen kote m t ap lite a; epi avèk pasyans, li te rete tann pou m te rele mande èd. Twò fèb pou m naje poukont mwen rive sou rivaj la, mwen te rekonesan anpil e mwen toujou rekonesan pou sekou li pote m nan. San èd li, mwen pa t ap ka janm retounen jwen fanmi mwen.

Jou sa a, mwen te fè yon move chwa ki ta kapab gen konsekans grav pou mwen menm ak fanmi mwen. Pandan ke ansanm nou pral pale de don pou fè chwa a, mwen priye pou Sentespri a ede nou chak endividyèlman pou evalye chwa n ap fè yo.

Pwofèt byenneme nou an, Prezidan Thomas S. Monson, te ansenye: “Mwen pa kwè l ap janm ase pou di nou ke desizyon detèmine destine. Nou pa kapab pran desizyon etènèl san konsekans etènèl.”¹

Nou chak, jan yo anseye nou nan konferans sa a, se yon pitit gason oswa pitit fi espri byenneme paran selès. Nou vrèman gen yon nati ak yon destine divin.² Pandan lavi premòtèl nou, nou te aprann renmen laverite. Nou te fè chwa etènèl korèk. Nou te konnen ke isit la, nan mòtalite a, t apral gen afliksyon ak advèsite, chagren ak soufrans, eprèv ak tribilasyon, pou ede nou grandi ak pwogrese. Nou te konnen tou ke nou ta p ka kontinye fè bon chwa, repanti pou move chwa yo, epi, gras ak sakrifis ekspiyatwa Jezikri a, eritye lavi etènèl.

Kisa pwofèt Leyi te anseye konsènan chwa? Li te konseye ke nou “lib pou chwazi libète ak lavi etènèl, pa mwayen gran Medyatè a ki pou tout moun nan, oubyen yo kapab chwazi kaptivite ak lanmò, dapre kaptivite ak pouvwa dyab la.” Apresa li te bay enstriksyon: “Pou nou apiye sou gran Medyatè a, koute gran kòmandman li yo e rete fidèl nan pawòl li yo, epi chwazi lavi etènèl.”³

Frè m ak sè m yo, nan sa nou chwazi pou nou panse, santi, ak fè, èske nou menm avèk mwen *chwazi lavi etènèl*?

Pitit pitit nou yo ap aprann ke lè yo fè yon chwa, yo chwazi konsekans li tou. Resamman youn nan pitit pitit fi twazan nou yo te refize manje dine li. Manman l te eksplike l: “Li preske lè pou al dòmi. Si w chwazi pou w manje, ou chwazi krèm glase pou desè. Si w pa chwazi pou w manje, ou chwazi pou w al kouche kounyeya, san krèm glase.” Pitit pitit fi nou an te

reflechi sou toulède chwa yo epi li te reponn enèjikman: “Mwen vle chwa *sa a---*pou m jwe *epi* manje sèlman krèm glase *epi* pa ale kouche.”

Frè m ak sè m yo, èske nou pa swete ke nou ta dwe jwe, manje krèm glase sèlman, pa janm al kouche, epi panse ke nou ka evite konsekans tankou malnitrisyon ak fatig?

An reyalite, nou gen sèlman de chwa etènèl, chak gen konsekans etènèl: chwazi pou suiv Sovè mond lan epi konsa chwazi lavi etènèl avèk Papa nou ki nan syèl la oubyen chwazi pou suiv mond lan epi konsa chwazi pou separe nou avèk Papa nou ki nan syèl la etènèlman.

Nou pa kapab reyisi nan chwazi alafwa sekirite yon lavi ladwati ak danje mond lan ansanm. Pataje plezi mond lan kapab sanble l san danje, men se konsa naje “rafrechisan” m nan te sanble tou!

Menm jan ak kouran an ki te ka chanje trajektwa lavi fanmi m nan, jodia, kouran mond lan, filozofi twonpè, fo ansèyman, ak imoralite enkontwolab ap chèche trennen nou deyò e separe nou etènèlman avèk fanmi nou ak Papa nou ki nan Syèl la.

Pwofèt vivan, vwayan, ak revelatè nou yo wè epi chèche avèti nou sou kouran danjere men sibtil yo nan mond lan k ap menase nou yo. Avèk amou, yo envite nou, ankouraje nou, anseye nou, raple nou, e avèti nou. Yo konnen ke sekirite nou depann sou chwa n ap fè pou suiv (1) vizyon nou jwenn nan etid ekriti ak priyè chak jou yo, nan meditasyon, ak lapriyè, (2) gidans Sentepri a, ak (3) konsèy pwofèt yo. Yo konnen ke gen sekirite ak lajwa finalman, sèlman nan epi atravè Sovè nou, Jezikri, ak nan viv Levanjil Li a. Jan Èldè Dallin H. Oaks fèk sot anseye a, Sovè nou an te deklare: “Mwen se chemen an, verite a, ak lavi a: pèsonn pa ka al jwenn Papa a si li pa pase pa mwen.”⁴

Pandan peryòd advèsite ak soufrans nan LaRisi Sovyetik anvan an, Anatoly ak Svetlana Reshetnikov te chwazi lajistis sou bagay mond lan. Apre yo te rantre nan Legliz la, yo te pèsekite yo. Yo te desann Frè Reshetnikov nan pozisyon travay li. Avèk vanyans, li menm ak madanm ni te panse: “Kounyeya nou gen plis tan pou sèvi Bondye!” Yo te resevwa menas tout tan, men yo te chwazi pou mennen yon lavi santre sou Levanjil la. Èldè Anatoly Reshetnikov te resevwa apèl kòm premye Swasanndis Otorite Zon nan Larisi. Atravè chwa yo, Reshetnikov yo kontinye *chwazi lavi etènèl*.

Nou tout fè fas avèk advèsite. Nou tout gen tantasyon. Nou tout fè erè. Li pa janm twò difisil ni twò ta pou nou fè chwa ki korèk. Repantans se youn nan chwa enpòtan ki korèk yo.

Prezidan Dieter F.Uchtdorf te anseye:

“Ti erè yo ak ti eka yo nan doktrin levanjil Jezikri a kapab gen konsekans tris pou nou. Se poutèt sa, li enpòtan anpil pou nou vin gen ase disiplin tèt nou pou nou fè koreksyon desizif yo rapidman pou nou ka retounen sou bon chemen an e pa tann ni espere ke erè yo ap fini pa korije poukont yo.

“Pi lontan nou tann pou nou fè koreksyon an, se plis chanjman nesèsè yo ap vin pi gwo, e se plis n ap pran tan pou retounen sou bon chemen an, nan pwen menm ke yon dezaz kapab ap tann nou.”⁵

Bra mizèrikòd Sovè a yo toujou rete lonje ap tann nou chak.⁶ Lè nou sensèman ak totalman repanti, nou kapab totalman jwenn padon pou erè nou yo epi Sovè a pa p sonje peche nou yo ankò.⁷

Lè n ap evalye chwa nou yo avèk konsekans yo, nou dwe mande tèt nou:

Èske m ap chèche direksyon divin atravè etid ekriti chak jou, meditasyon, ak lapriyè, oubyen èske m chwazi pou m sitèlman okipe oubyen endiferan ke m pa pran tan pou m etidye pawòl Kris yo, medite yo, epi konvèsè avèk Papa m ki nan Syèl la?

Èske m chwazi pou m suiv konsèy pwofèt vivan Bondye yo, oubyen èske m ap suiv wout mond lan yo ak opinyon opoze lòt moun?

Èske m chache gidans Sentespri a chak jou nan sa m chwazi pou m panse, santi, ak fè?

Èske m konstaman chèche pou ede, sèvi ak pote lòt moun sekou?

Chè frè m ak sè m yo, destine etènèl nou pa pral rezilta lachans men se pral rezilta chwa nou. Li pa janm twò ta pou nou kòmanse chwazi *lavi etènèl!*

Mwen rann temwanyaj mwen ke gras ak gwo plan bonè Papa nou ki nan Syèl la, nou chak kapab pèfeksyone nou atravè Sakrifis ekspiyatwa Jezikri a. Avèk fanmi nou, nou ka viv avèk Papa nou ki nan Syèl la etenèlman epi

resevwa yon plenitud lajwa. Konsènan bagay sa yo mwen temwaye nan non Jezikri, amèn.

Nòt

1. Thomas S. Monson, “Desizyon detèmine destine” (Kwendfe Sistèm Edikatif la pou jèn adilt yo, 6 Nov 2005), <http://lds.org/library/display/0,4945,538-1-3310-1,00.html>.
2. Gade “Fanmi: Yon Pwoklamasyon pou Mond lan,” *Liahona* Nov. 2010, 129
3. 2 Nefi 2:27, 28; italik ajoute
4. Jan 14:6.
5. Dieter F. Uchtdorf, “A Matter of a Few Degrees,” *Liahona* Me 2008, 59.
6. Gade Alma 5:33.
7. Gade Doktrin ak Alyans 58:42.